

Bouônjour m's anmîns,

Ev'chîn chu boustre d'angliais Tony Scott Warren tch'a l'pliaîsi d'cliutter les tîmbres pour env'yer vot' Lettre Jèrriaise dé siez mé à Howden dans l'pays du Bouôn Dgieu, Yorkshire. Il a pâssé un tas dg'ieau par la Corbiéthe d'pis ma dreine Lettre, et nos v'chîn achteu en plieine été. Lé froment est à meûsi dans les grands clios alentou d'siez nous. Sus lus bords, les pavots sont à fliethi et lé rouoge fait eune belle contraste auve l'or d's épis d'graine. Bétôt les grandes machinnes à battre arriv'thont pour c'menchi l'avoût.

Au but d'not' ruelle, des vacques néthes et blianches, pas si belle qu'les Jèrriaises, cherchent dé l'abri du solé, d's achies d'plyie ou d's orages d'été sous les bouais. I' m'sembl'ye qué jé n'avons pon autant d'plyie ichîn qu'en Jèrri, viyant qué les nuages venant du vouêt laissent tchaie la plyie sus l'haut des Pennines dé tchi qué j'sommes ombré.

Depis lé c'menchement du virus, quand tout l'monde 'tait renfreunmé siez-ieux, les gardîns sont dev'nus des r'fuges. Achteu, quand tant d'gens ont changi d'travaillyi dans d's offices pour en faithe siez-ieux, i' sont à tchitté les grandes villes et cités pour lus r'muer à la campagne, et chein qu'i' cherchent, ch'est eune maîson auve un gardîn.

La pus janne d'nos fil'yes d'meuthe pas liain d'Londres et ou n'a rein qu'un p'tit bel en driéthe d'sa maîson, mais oulle est entchethinée pour l'gardinage. Oulle a travaillyi dû pour changi san p'tit betchet d'terre dans un gardîn pliaissant. Oulle y craît des flieurs et des ledgeunmes - la pûspart dans des pots ou des tros. Ou nos dit qu'les cocombes qu'oulle est à tchillyi sont tout à fait difféthents des cheins du supermarchi. Oulle aime bein ses salades et ses frâses. Malheutusement ses malins p'tits catons aiment jouer ou dormi parmi ses flieurs, et ou l's en trouve tchiquefais compliétement êcrasés et gâtés. Sa soeu, tchi d'meuthe tout près d'siez nous, a un grand gardîn et ou lyi envye des graines d'flieurs dé temps en temps pour les rempliaichi.

Pour dé nous, not' gardîn quand j'acatînmes la maîson n'tait qu'un tapis d'vèrduthe auve eune petite bordeuse avec chîng ou siez arbustes, dé tchi trais mouothitent déliément. Ch'tait en effet un portrait prêt à peindre. Achteu j'ai des grandes bordeuses tchi c'menchent à être remplyi d'flieurs.

J'ai planté un pommyi, un tchoeuryi et un érabl'ye japonais, en angliais un acer. Dans la carre à ledgeunmes, j'ai des laitues et des caboches, des chibots et des courgettes. J'ai acouo bein d'travas à faithe - j'veurs pus d'bordeuses, p't'être eune mathe auve des païssons, eune sèrre et un hangar d'gardîn.

Mais lé gardinage s'est arreté pouor mé pouor au mains deux'trais mais. Par l'temps qu'ou ouïyiz chute Lettre, si tout s'est bein pâssée, jé s'sai à l'hôpita auve un neu g'nou drouait à rempliaîchi l'chein qu' j'ai ieu toute me vie jusqu'achteu, mais tchi n'peux pas continuer. Quand j'nos r'muons en Angliétèrre, j'marchi trais fais par semaine l'tou d'siez nous pouor explorer lé vaîsinné. Mais, au mié-avri, en r'vant siez nous, ma gambe mé f'sait si ma qué j'avais à m'arreter. Un x-ray montrit dé rhonmatisse et un manque dé cartilage dans lé g'nou. L'ayant rempliaichi, j'espèthe èrc'menchi l'explorâtion dé Yorkshire - et d'èrvisiter Jèrri d'vant trop longtemps!

Mèrcie bein des fais pouor m'aver êcouter, et j'vos souhaite bouon santé. À bêtôt.